



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.163/2025

Paneli Zgjedhor për Ankesa dhe Parashtresa (PZAP), i përbërë nga gjyqtarët Ramush Bardiqi - kryesues, Bujar Muzaqi dhe Hajriz Hoti - anëtarë, duke vendosur përkitazi me ankesat e subjektit politik Lëvizja Vetëvendosje (LVV), me seli në Prishtinë kundër subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore për Kuvendin e Republikës së Kosovës, që do të mbahen më datë 09 Shkurt 2025, në seancën e panelit të mbajtur me 25.01.2025, mori këtë:

V E N D I M

I. Pranohen të bazuara ankesat e subjektit politik Lëvizja Vetëvendosje (LVV), me seli në Prishtinë, Anr.163/2025, Anr.164/2025 dhe Anr.168/2025 të datës 23.01.2025, ashtu që subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjorbë në lartësi prej 4,000.00 (katërmijë) euro.

II. Detyrohet Subjekti politik Lidhja Demokratike e Kosovës (LDK), me seli në Prishtinë, që gjorbën e shqiptuar si në pikën -I-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datë 23.01.2025 PZAP-i, ka pranuar ankesën Anr.163/2025 nga subjekti politik Lëvizja Vetëvendosje (LVV), me të cilën pretendon se më datë 22.01.2025, aktivistë të Lëvizjes Vetëvendosje në Suharekë në rrugën "Brigada 123" kanë identifikuar banerët/posterët e vendosura në hapësirat/rrugët publike dhe në shtyllat elektrike-ndriçues të rugës, të kandidatëve për deputetë nga radhët e LDK-së, Shemsije Bytyqi, Lumir Abdixhiku, Shaqir Kryeziu, Urim Suka, Selman Kolgeci.

Me datë 23.01.2025 PZAP-i, ka pranuar ankesën Anr.164/2025 nga subjekti politik Lëvizja Vetëvendosje (LVV), me të cilën pretendon se më datë 22.01.2025, aktivistë të Lëvizjes

Vetëvendosje në Suharekë në rrugën “Xhavit Bajraktari” kanë identifikuar banerët/posterët e vendosura në hapësirat/rrugët publike dhe në shtyllat elektrike-ndriçues të rrugës, të kandidatëve për deputetë nga radhët e LDK-së, Lumir Abdixhiku, Ardian Shala, Urim Suka, Shaqir Kryeziu, Selman Kolgeci, Shemsije Bytyqi.

Me datë 23.01.2025 PZAP-i, ka pranuar ankesën Anr.168/2025 nga subjekti politik Lëvizja Vetëvendosje (LVV), me të cilën pretendon se më datë 22.01.2025, aktivistë të Lëvizjes Vetëvendosje në Suharekë në rrugën “Brigada 123” kanë identifikuar banerët/posterët e vendosura në hapësirat/rrugët publike dhe në shtyllat elektrike-ndriçues të rrugës, të kandidatëve për deputetë nga radhët e LDK-së, Shemsije Bytyqi, Lumir Abdixhiku, Ardian Shala, dhe Selman Kolgeci,

Sipas parashtruesit të ankesave me këtë veprim kandidatët dhe subjekti politik LDK kanë bërë shkelje të nenit 34, paragrafi 1 nën paragrafi 1.2, të Ligjit Nr.08/L-228 për Zgjedhjet e Përgjithshme në Republikën e Kosovës-LZP, ku parashihet se *“Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose në hapësirat private pa lejen e pronareve ose shfrytëzuesve.”*

Si provë ka bashkangjitur, fotografi që dëshmon vendosjen e banerave/posterave në kundërshtim me LZP.

Më datë 24.01.2025, PZAP-i, e njoftoi subjektin politik Lidhja Demokratike e Kosovës (LDK) për ankesën e paraqitur kundër tyre, duke i dërguar kërkesë për përgjigje deri më 25.01.2025 në ora 09:00.

Në përgjigje në ankesë të paraqitur me datë 25.01.2025, subjekti politik Lidhja Demokratike e Kosovës (LDK) ka kundërshtuar ankesën e paraqitur nga subjekti Lëvizja Vetëvendosje (LVV), në të cilën ka theksuar se meqë rastet janë identike janë inkorporuar në një përgjigje, për të respektuar edhe parimin e ekonomizimit të procedurës. Kandidatët për deputet Ardian Shala, Shemsije Bytyqi, Shaqir Kryeziu, Urim Suka dhe Selman Kolgeci, kanë reaguar brenda kohës duke bërë evitimin e shkeljes së pretenduar nga subjekti politik LVV

Përmes përgjigjes në ankesë subjekti politik LDK, ka kërkuar nga PZAP që të marrë vendim meritator për rastet në fjalë, si dhe duke u bazuar në provat e bashkangjitura që dëshmojnë evitimin e shkeljes.

Si provë në përgjigje në ankesë ka bashkangjitur fotot nga terreni.

Paneli, në kuptim të nenit 9 paragrafi 5, nën paragrafi 5.5 të Rregullores Nr.01/2024, për Procedurat e Parashtrimit dhe Vendosjes së Ankesave të PZAP-it, dhe nenit 84 paragrafi 1 të Ligjit Nr.05/L-031, për Procedurën e Përgjithshme Administrative, me qëllim të ekonomizimit të procedurës, ka bashkuar ankesat A.nr.163/2025, A.nr.164/2025 dhe A.nr.168/2025 të paraqitura me datë 23.01.2025, dhe janë trajtuar me një vendim, andaj procedimi i këtyre ankesave evidentohen nën shenjën e përbashkët A.nr.163/2025, për shkak të natyrës së njëjtë të çështjeve të parashtruara nga subjekti i njëjtë politik LVV kundër subjektit të njëjtë politik LDK, si për nga përmbajtja ashtu edhe për nga kërkesat e paraqitura të ankesave.

PZAP-i, pasi që shqyrtoj dhe vlerësoi ankesat gjeti se:

Ankesat janë të bazuara

Paneli, nga fotografitë e ofruara si provë nga parashtruesi i ankesës, të cilat gjenden në shkresat e lëndës, në mënyrë të padyshimtë ka konstatuar se kandidatet e subjektit politik LDK Lumir Abdixhiku Ardian Shala, Shemsije Bytyqi, Shaqir Kryeziu, Urim Suka dhe Selman Kolgeci, kanë shfrytëzuar jashtëligjshëm dhe në kundërshtim me dispozitat ligjore hapësirat publike konkretisht hapësirat/rrugët publike pa marrë leje nga organet kompetente të Komunës së Suharekës. Një veprim i tillë është në kundërshtim me nenin 34, paragrafi 1 të Ligjit Nr.08/L-228 për Zgjedhjet e Përgjithshme në Republikën e Kosovës LZP, konkretisht neni 34, paragrafi 1 nën paragrafi 1.2 i LZP-së parasheh: "*1. Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: 1.2 vendosja e njoftimeve, pllakateve dhe posterëve, ose përndryshe, vendosja e emrave të tyre ose e sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugët publike, në shenjat publike të trafikut, brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombëtare, ose brenda ose në hapësirat private pa leje e pronarëve ose shfrytëzuesve.*

Neni 120 paragrafi 1 nën paragrafi 1.3 të LZP-së thekson se në rast se PZAP përcakton se ka ndodhur shkelje e të këtij ligji ose e rregullave të KQZ-së, mundet të vendosë një gjobë ndaj një subjekti politik, në vlerë deri në pesëdhjetëmijë (50,000.00) Euro. Përveç kësaj një veprim i tillë sanksionohet edhe me nenin 24 paragrafi 6 nën paragrafi 6.1 Rregullës Nr.01/2024, ku përcaktohet se "subjekti politik që është përfitues i fondeve për financimin e subjekteve politike përmes Buxhetit të Republikës së Kosovës dënohet me gjobë deri në njëzetmijë (20,000.00)euro.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm, subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik LDK, ka qenë i njoftuar me obligimet dhe përgjegjësit gjatë procesit të fushatës. Paneli për lartësinë e gjobës ka vlerësuar si rrethanë lehtësuese faktin që subjekti politik në fjalë ka bërë përpjekje te arsyeshme për ta evituar shkeljen -heqjen e posterave nga rrugët publike, që ishte vendosur nga kandidatët për deputet Lumir Abdixhiku Ardian Shala, Shemsije Bytyqi, Shaqir Kryeziu, Urim Suka dhe Selman Kolgeci, nga radhët e Subjektit Politik LDK.

Nga arsyet e theksuara me lart, e në kuptim të nenit 34 paragrafi 1 nën paragrafi 1.2, nenit 118 paragrafi 1, neni 120 paragrafi 1 nën paragrafi 1.3, të LZP-së, nenit 10 paragrafi 1, nën paragrafi 1.2 të Rregullores Nr.01/2024 për Procedurat e Parashtrimin dhe Vendosjes së Ankesave vendosi si në dispozitiv të këtij vendimi.

Paneli Zgjedhor për Ankesa dhe Parashtrës
Anr.163/2025 më datë 25.01.2025



Këshilla Juridike: Kundër këtij vendimi nuk lejohet ankesa konform nenit 118 par. 4 të LZP-së.